

**O‘ZBEKISTON RESPUBLIKASI VAZIRLAR MAHKAMASINING
QARORI**

**TOSHKENT SHAHRIDAGI YODJU TEXNIKA INSTITUTI FAOLIYATINI TASHKIL
ETISHNING QO‘SHIMCHA CHORA-TADBIRLARI TO‘G‘RISIDA**

Respublika iqtisodiyot tarmoqlari uchun arxitektura va shaharsozlik, qurilish, muqobil energiya, turizm va biznes sohalarida xalqaro talablar va standartlarga muvofiq yuqori malakali kadrlar tayyorlash, oliy ta’lim sohasida davlat-xususiy sheriklik munosabatlarini yanada kuchaytirish, xorijiy davlatlarning yetakchi oliy ta’lim muassasalari bilan uzoq muddatli munosabatlarni rivojlantirish hamda Toshkent shahridagi Yodju texnika instituti faoliyatini takomillashtirish maqsadida Vazirlar Mahkamasi qaror qiladi:

1. Quyidagilar:

a) “Global education school” nodavlat ta’lim muassasasi hamda “YUKET LLC” mas’uliyati cheklangan jamiyati (Koreya Respublikasi) (keyingi o‘rinlarda Muassis deb ataladi) hamkorligida tashkil etilgan “Toshkent shahridagi Yodju texnika instituti” mas’uliyati cheklangan jamiyati shaklidagi qo‘shma korxonasi (keyingi o‘rinlarda Institut deb ataladi) o‘z faoliyatini Vazirlar Mahkamasining “Nodavlat ta’lim xizmatlari ko‘rsatish sohasidagi faoliyatini litsenziyalash tartibini takomillashtirish to‘g‘risida” 2018-yil 27-martdagi 241-son [qaroriga](#) muvofiq Vazirlar Mahkamasi huzuridagi Ta’lim sifatini nazorat qilish davlat inspeksiyasi tomonidan berilgan litsenziya asosida 2018-yilning sentyabr oyidan boshlaganligi;

b) Muassislar tomonidan Institutning asosiy vazifalari etib:

mehnat bozorining ehtiyojlarini inobatga olgan holda, mamlakatni ijtimoiy-iqtisodiy rivojlanish istiqbollariga, shuningdek, 2017 — 2021-yillarda O‘zbekiston Respublikasini rivojlantirishning beshta ustuvor yo‘nalishi bo‘yicha [Harakatlar strategiyasida](#) belgilangan vazifalarga muvofiq, arxitektura va shaharsozlik, qurilish, muqobil energiya, turizm va biznes sohalarida hamda talab yuqori bo‘lgan boshqa yo‘nalishlar bo‘yicha oliy malakali kadrlar tayyorlash;

kadrlar tayyorlashda arxitektura va shaharsozlik, qurilish, muqobil energiya, turizm va biznes sohalarida bo‘yicha faoliyat olib borayotgan tashkilotlarda talabalar amaliyotini muntazam tashkil etish;

o‘quv-tarbiya jarayonini tashkil etishda xorijiy tajribani, zamonaviy pedagogik va axborot-kommunikatsiya texnologiyalarini joriy etish, o‘quv jarayoniga malakali xorijiy, xorijda tahsil olgan va malaka oshirgan mahalliy mutaxassislarini jalb etish;

ilmiy izlanishlarga ehtiyojni inobatga olgan holda arxitektura va shaharsozlik, qurilish, muqobil energiya, turizm va biznes sohalarida hamda talab yuqori bo‘lgan boshqa yo‘nalishlar bo‘yicha innovatsion va ilmiy-tadqiqot faoliyatini olib borish;

arxitektura va shaharsozlik, qurilish, muqobil energiya, turizm va biznes sohalarida ilmiy-tadqiqot va ta’lim muassasalari, tashkilotlar bilan mustahkam hamkorlik aloqalarini o‘rnatish, integratsiyani kuchaytirib borish belgilanganligi ma’lumot uchun qabul qilinsin.

2. Belgilansinki:

Institut mas’uliyati cheklangan jamiyat shaklidagi nodavlat oliy ta’lim tashkiloti hisoblanadi;

Institut rektori muassislar tomonidan O‘zbekiston Respublikasi Oliy va o‘rta maxsus ta’lim vazirligi bilan kelishilgan holda lavozimga tayinlanadi va lavozimidan ozod qilinadi;

Institutning tuzilmasi muassislar tomonidan tasdiqlanadi;

Institut ta’lim faoliyatini O‘zbekiston Respublikasining ta’lim to‘g‘risidagi qonun hujjatlari talablarini inobatga olib, O‘zbekiston Respublikasi Oliy va o‘rta maxsus ta’lim vazirligi bilan kelishilgan holda Yodju texnologiya institutining (Koreya Respublikasi) o‘quv rejalari va dasturlari asosida o‘zbek, rus va ingliz tillarida amalga oshiradi;

Institut bitiruvchilariga O‘zbekiston Respublikasida oliy ma’lumot to‘g‘risidagi hujjat sifatida e’tirof etiladigan belgilangan namunadagi diplom beriladi;

Institutga talabalar qabuli umumiy oʻrta, oʻrta maxsus, kasb-hunar maʼlumotga ega abituriyentlar oʻrtasida kirish imtihonlarini Yodju texnologiya instituti (Koreya Respublikasi) tomonidan (yoki ishtirokida) oʻtkazish orqali amalga oshiriladi;

abituriyentlarni qabul qilish parametrlari va tartibi, bitiruvchilarning yakuniy attestatsiyasi tartibi va shartlari Institut tomonidan Yodju texnologiya instituti (Koreya Respublikasi) bilan kelishilgan holda belgilanadi;

Institutda oʻqish toʻlov-kontrakt asosida, kunduzgi, sirtqi va kechki shaklda amalga oshiriladi, talabalar oʻqishi uchun toʻlov-kontrakt mablagʻlari miqdori muassislar tomonidan belgilanadi.

3. Muassisning har yili ijtimoiy himoyaga muhtoj oilalarning qobiliyatli, iqtidorli hamda oʻzlashtirish koʻrsatkichlari yuqori boʻlgan farzandlari orasidan tanlov asosida bepul (Institut granti asosida) 10 nafardan kam boʻlmagan abituriyentlarni oʻqishga qabul qilish majburiyatlarini oʻz zimmasiga olishi toʻgʻrisidagi taklifi maʼqullansin.

4. Belgilab qoʻyilsinki, Institutning bino va inshootlarini rekonstruksiya qilish va kapital taʼmirlash, uni oʻquv va laboratoriya jihozlari, mebel, kompyuter texnikasi, oʻquv va uslubiy adabiyotlar, shuningdek, boshqa moddiy-texnik jihozlar bilan taʼminlash quyidagi manbalar hisobiga amalga oshiriladi:

Institut muassislari mablagʻlari;

toʻlov-kontrakt asosida oʻqitishdan tushadigan mablagʻlar;

xoʻjalik faoliyatidan va shartnoma asosida xizmatlar koʻrsatishdan tushadigan tushumlar;

jismoniy va yuridik shaxslarning homiylik xayriyalari;

xalqaro moliya tashkilotlarining grantlari, shuningdek, xorijiy hamkorlarning mablagʻlari; qonun hujjatlarida taqiqlanmagan boshqa manbalar.

5. Institutga Oʻzbekiston Respublikasi Vazirlar Mahkamasi huzuridagi Taʼlim sifatini nazorat qilish davlat inspeksiyasi, Oliy va oʻrta maxsus taʼlim vazirligi hamda Yodju texnologiya instituti (Koreya Respublikasi) bilan kelishilgan holda, mehnat bozori talablari va ijtimoiy-iqtisodiy rivojlanish istiqbollari kelib chiqib, kelgusida yangi bakalavriat taʼlim yoʻnalishlari va magistratura mutaxassisliklarini ochish huquqi berilsin.

6. Oʻzbekiston Respublikasi Tashqi ishlar vazirligi Oliy va oʻrta maxsus taʼlim vazirligi hamda Institut buyurtmanomalariga binoan mazkur qarorni amalga oshirish doirasida jalb qilinadigan xorijiy professor-oʻqituvchilar tarkibi va maʼmuriy xodimlar hamda ularning oila aʼzolari uchun kirish vizalari konsullik hamda boshqa yigʻimlar undirilmasdan, belgilangan tartibda rasmiylashtirilishini taʼminlasin.

7. Oʻzbekiston Respublikasi Ichki ishlar vazirligi Oliy va oʻrta maxsus taʼlim vazirligi hamda Institut buyurtmanomalariga binoan mazkur qarorni amalga oshirish doirasida jalb qilinadigan xorijiy professor-oʻqituvchilar tarkibi va maʼmuriy xodimlar hamda ularning oila aʼzolari uchun davlat boji undirilmasdan, belgilangan tartibda koʻp martalik vizalar berilishi va uzaytirilishini, shuningdek, ularning yashash manzillari boʻyicha vaqtinchalik roʻyxatdan oʻtkazilishi hamda uning muddati uzaytirilishini taʼminlasin.

8. Mazkur qarorning bajarilishini nazorat qilish Oʻzbekiston Respublikasi Bosh vazirining ijtimoiy rivojlantirish masalalari boʻyicha oʻrinbosari A.A. Abduxakimov, Oʻzbekiston Respublikasi oliy va oʻrta maxsus taʼlim vaziri I.U. Madjidov hamda Vazirlar Mahkamasi huzuridagi Taʼlim sifatini nazorat qilish davlat inspeksiyasi boshligʻi U.N. Tashkenbayev zimmasiga yuklansin.

Oʻzbekiston Respublikasining Bosh vaziri A. ARIPOV

Toshkent sh.,
2019-yil 17-dekabr,
1007-son

(Qonun hujjatlari maʼlumotlari milliy bazasi, 18.12.2019-y., 09/19/1007/4166-son)